



Komunikadu Imprensa
11 Juñu 2024

Xefe Aldeia Usapibela Oekusi rekoñese ninia comunidade menus informasaun kona-ba asesu ba justisa formál nune'e dalabarak halo sira la hato'o keixa

Iha 23 Maiu 2024, JSMP kontinua fahe informasaun kona-ba prosesu justisa formál ba autoridade lokál no mós comunidade iha Aldeia Usapibela, Suku Lalisuk, Sub-Rejiaun Pante-makasar, Rejiaun Administrativa Espesiál Oekusi Ambeno.

Objetivu hosi dezaminasaun informasaun ne'e mak atu hasa'e koñesimentu estrutura aldeia no comunidade sira-nian kona-ba oinsá asesu ba justisa formál no asegura rezolve kazu disputa sira no kazu seluk tan iha aldeia ho baze tuir lei formál sira ne'ebé vigora ona.

Dezaminasaun ne'e kobre asuntu sira mak hanesan definisaun lei no krime, tipu no natureza krime, ho ninia pena no mós prosedimentu ba iha kazu krime no sivíl iha prosesu justisa formál. Alende ne'e, esplika mós kona-ba papél estrutura aldeia sira bainhira akontese disputa ruma iha aldeia. Ekipa JSMP mós fahe informasaun kona-ba serbisu rede referral nian iha serbisu assisténsia legál ba vítima fetu no labarik.

“JSMP dezamina informasaun kona-ba asesu ba justisa formál to'o iha nível aldeia tanba dalabarak informasaun sira to'o de'it iha nível suku nune'e liuhosi atividade ne'e JSMP espera katak autoridade lokál no comunidade sira iha Aldeia Usapibela, Oekusi bele iha ona koñesimentu kona-ba dalan prosesu justisa formál no bele jere sira nia kazu tuir lei,” dehan Sra. Ana Paula Marçal, Diretora Ezekutiva JSMP.

Xefe Aldeia Usapibela, Sr. Jacob Cusi iha nia abertura hato'o argradese wain ba JSMP no haktuir katak dalabarak dezaminasaun informasaun sira hanesan ne'e iha duni maibé sempre realiza de'it iha nível suku no la to'o ba aldeia sira nune'e comunidade sira iha aldeia laiha koñesimentu kona-ba prosesu justisa formál. Xefe aldeia ne'e mós konsidera informasaun sira ne'ebé JSMP fahe ne'e importante tebes ba comunidade Aldeia Usapibela tanba comunidade hela dook tebes hosi sede suku, nune'e sira nunka envolve iha atividade sira hanesan ne'e no bainhira hasoru problema comunidade sira sempre nonook no la hato'o informasaun ka keixa ba autoridade kompetente sira tanba sira laiha koñesimentu.

Iha tempu hanesan, Xefe Aldeia Noapai hosi Suku Cunha ne'ebé partisipa mós iha treinamentu ne'e rekomenda ba JSMP atu kontinua fahe informasaun ba iha aldeia no

JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

bairro seluk ne'ebé indentifikadu dook hosi sede suku, nune'e comunidade sira bele iha koñesimentu no bele trata sira nia kazu sira tuir sistema justisa formál.

Partisipante sira ne'ebé partisipa iha dezaminasaun ne'e ativu tebes hodi hato'o sira nia preokupasaun sira relasiona ho kestaun prosesu bainhira to'os na'in oho animal ema seluk nian ne'ebé tama sira nia toos, oinsa ho comunidade balun ne'ebé ta'uk atu hato'o keixa, diferencia entre krime públiku no semi-públiku, prosesu justisa formál ne'ebé lori tempu naruk no serake comunidade bele husu fali sira nia osan ne'ebé fó ona ba advogadu kuandu kazu ne'ebé advogadu refere kaer la manan iha tribunál.

Hatan ba preokupsaun sira ne'e, JSMP esplika katak animal ne'ebé mak tama estraga ema seluk nia aihan ka ai-horis iha to'os laran no bainhira to'os na'in hetan tenke fó hatene ba animal na'in atu animal na'in selu fali aihan ka ai-horis ne'ebé animal refere estraga, importante labele oho-mate animal refere. Bainhira to'os na'in oho mate animal refere, to'os na'in sei hetan kastigu ba prizaun ka multa no sei selu fali animal ne'ebé nia oho, enkuantu animal na'in selu fali ai-horis ka sasan ne'ebé nia animal estraga ba to'os na'in tuir prosesu sivil.

Kestaun kona-ba ta'uk atu hato'o keixa iha kazu VD, JSMP hatan katak kualkér krime ne'ebé envolve fe'en ho la'en, eis fe'en ho eis la'en ka ema seluk ne'ebé hela hamutuk iha uma laran no dependénsia ekonomia ba malu konsidera krime VD no ida ne'e krime públiku, tanba ne'e se de'it mak hetan ka hatene bele apresenta denuncia ba autoridade polisia ka ministériu públiku. Entretantu, kuandu ajente polisia, funsionáriu públiku ka autoridade públiku mak haree no hatene kona-ba krime VD, sira iha obrigasaun atu halo partisipasaun maibé karik sira la halo partisipasaun, sira sei hatan ba krime ida ho naran la partisipasaun tuir artigu 286 Kódigu Penál no bele hetan kastigu.

Kestaun kona-ba prosedimentu kriminal ba krime públiku no semi-públiku, JSMP hatan katak krime públiku nia prosedimentu mak kualkér se de'it mak haree bele apresenta denúnsia, labele dada fali bainhira rejistu ona iha polisia ka prokuradór. Bele rezolve tuir família ka kultura bainhira parte sira hakarak maibé kazu refere tenke kontinua prosesu to'o ba tribunál tanba úniku tribunál mak bele hakotu/tesi.

Entretantu ba krime semi-públiku, depende keixa hosi vítima, prazu atu hato'o keixa mate iha fulan neen (6) nia laran. Kazu refere mós bele dada fali hosi prosesu justisa formál bainhira vítima hakarak no fó fatin ba autoridade lokal ka família atu tesi/hakotu.

Kestaun kona-ba prosesu han tempu kleur, JSMP responde katak haree ba rekursu umanu ne'ebé kolokadu iha Tribunál Judisiál Primeira Instáncia Oekusi limitadu tebes no dalaruma iha kazu krime balun tenke adia ba dala rua ka dala tolu mak foin

JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

judgamentu tanba dalaruma autór tribunál sira iha impedimentu (kestaun pessoal no bele mós ajenda soke malu) no dalaruma mós parte sira iha impedimentu, situasaun ne'e halo prosesu sira kleur.

Kestaun kona-ba foti fali osan hosi advogadu kuandu advogadu la manan kazu iha tribunál, JSMP hatan katak kuandu arguidu iha kapasidade ekonomia nia tenke hili defeza hosi advogadu privadu ka nia rasik mak hakarak uza advogadu privadu, nune'e nia automatikamente tenke selu tanba advogadu privadu sira la hetan osan/saláriu hosi Estadu no bainhira to'o iha prosesu ninia finalidade mak lakon, osan ne'ebé selu ona sei la-fó fila, maibé depende mós ba kontratu karik iha kontratu dehan bainhira la manan kazu ne'ebé nia defende tenke fó fila osan, advogadu refere iha obrigasaun atu fó fila kliente nia osan. Alende ne'e, JSMP mós esplika kona-ba diferente entre defensoria públiku no advogadu privadu.

Partisipante sira hamutuk ema na'in 53 ne'ebé kompostu hosi feto 22, mane 31 . Partisipante sira ne'e iha mós membru defisiénsia na'in rua (2) no LGBTIQ+ na'in ida (1). Partisipante sira ne'e mai hosi Xefe Aldeia Usapibela, OPS Suku Lalisuk, Katekista, no membru comunidade Aldeia Usapibela.

Atividade treinamentu ne'e realiza hosi JSMP liuhosi programa apoiu seguransa komunitáriu (PASK), tanba serbisu hamutuk ho The Asia Foundation (TAF) ne'ebé finansia husi Embaixada Nova Zelandia.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl